

Time - 7:30 -7:40Hrs
Regional News Unit AIR Aizawl
Thursday, March 06, 2025

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n Sawhthing dahna hmun kudam hrang hrang leh Collection Centre a khah tawh avangin sawhthing lei an chawlh rih a ngai dawn a ti.
- Zu khap burna dan siamthatna tur, nimin sessiona pharh tur chu eptu MLA ten a hma zana an hmuh chauh avangin, an zirchian hnu ni 2 emaw ni 3 hnuah emaw sawiho tura sawn a ni.
- PM Modia chuan Japan sumdawng lianten India-a an huang zauh tura ruahmanna an siam chuan a ti phur hle tih a sawi.
- Union Cabinet chuan Soprayag atanga Kedarnath kalpawhna tur ropeway siam a remti.

<><><>

CM

Chief Minister Pu Lalduhoma'n Sawhthing dahna hmun kudam hrang hrang leh Collection Centre a khah tawh avangin sawhthing lei an chawlh rih a ngai dawn a ti a, an hralh thawl hunah Sawhthing lei chu an chhunzawm leh dawn a ti.

Nimina Assembly thutkhawma zawhna leh chhanna hunah he thu hi sawiin Chief Minister chuan sawhthing an lak khawm an dahna hmun chu a khah tawh avangin inhralh thawl phawt a ngai a ti a, a tahtawlin an tih dawn avangin kuthnathawktute hmanhmawh lo tura chahin an inhralh thawl hunah leh dahna tur a ruah velah sawhthing an lei chhunzawm dawn tih a sawi.

Pu Lalduhoma chuan sawhthing chu kumin chhunga tharchhuah chu an lei ngei dawn tih sawiin kuthnathawktute thlaphang lo turin a chah a, an lei sa chu hralhna tur an ngaihtuah tih a sawi.

Byte... Chief Minister 16 secs

Chief Minister sawi danin, sawhthing chu Reliance Company in kg khatah cheng 80 in an la a, Kolkata-a Reliance Outlet-a zawrh turin sawhthing chauh lo thlai thar dang pawh an lei a, kumtluanin an duh reng bawk a, tunah hian Mizoram ah Collection Centre din an duh tawh a ni a ti.

<><><>

AGRICULTURE MINISTER

Agriculture Minister Pu PC Vanlalruata'n tun dinhmunah sawhthing chu Grade-a then tumna a awm rihlo a ti a, chhungkaw khat atangin lei tur zat bithliah a awmlo bawk a ti.

He thu hi nimina zawhna leh chhanna hunah Congress MLA Pu C. Ngunlianchunga zawhna chhangin Minister chuan a sawi a, sawhthing leikhawmna atan Sawrkarin Secondary Collection 62 a siam a, Secondary Collection Centre ah auction a ni dawn tih sawiin kg khatah cheng 50 a tlin lohna chu support price hmangin kuthnathawktute hnenah pek a ni dawn tih a sawi.

Agriculture Minister chuan sawhthing leina atana an inbuatsaihna pakhat chu Secondary Collection Centre-a auction a ni a ti a, kg khata cheng 50 in a chhangtu an awmloh chuan sawrkarin a laksak dawn a ti a, hei hi Secondary Collection mumal zawka kalpui anih theih nana bultan chhungte, a man sang zawka nawr anih theih beiseina leh an tharchhuah tam thut avanga buaina awm venna atana hmalakna ani tih a sawi.

Minister chuan Sawrkarin sawhthing man a tum chin tur chu kuthnathawktute hnenah Direct Beneficiary Transfer hmanga pek tura ruahman a ni a ti a, Secondary Collection Centre chu Society hnuaia sumdawnna puitling kalpui thei tura thuam chak a, support price hmanga sawhthing man hniam lutuk tur ven chu sawrkar tum dan a ni a ti a, Market ngelnghet zawk siam theihna tur ani beisei a ni a ti bawk.

<><><>

MLP ACT AMENGMENT BILL

Zu zawrhna dan siamthatna tur, “The Mizoram Liquor (Prohibition) Amendment Bill, 2025” nimin sessiona pharh tur chu eptu MLA ten a hma zana an hmuh chauh avangin, an zirchian hnu ni 2 emaw ni 3 hnuaah emaw sawiho tura sawn a ni.

Nimin Assembly rorel inkhawma ngaihtuah tur, “The Mizoram Liquor (Prohibition) Amendment Bill, 2025” chu a puluttu tur Excise & Narcotics Minister Pu Lalnghinglova Hmar sawm a nih hma-in Speaker Pu Lalbiakzama’n eptu party hruaitu pathum – Pu Lalchhandama Ralte, Dr. K Beichhua leh Pu C Ngunlianchunga te’n tukinah a pisa-ah an hmuh thu leh, Bill copy chu nizana an hmuh chauh thu te, inzirna hun an la neih loh bawk avangin ni 2 emaw ni 3 hnuaah emaw sawiho mai ni se ti-a an ngen thu a sawi a. House Leader leh Parliamentary Affairs Minister te a rawn hnuaah eptute ngenna chu zahawm an ti a, Bill chu hun danga putluh atan an ti ta niin a sawi.

<><><>

RICE PROCUREMENT MEETING

Chief Minister Pu Lalduhoma hovin a office-ah Mizoram State Government Paddy & Rice Procurement Committee chu nimin khan an thukhawm a.

Mizoram sawrkar chuan Mamit leh Kolasib district atanga Loneitute thar chhuah buhhum lei a, Om Om Modern Rice Mill, Pangbalkawn, Kolasib district hmanga her a lo rel tawh a. Buhhum hi kg khat Rs. 30 zelin Rice Mill hmunah a lei a, hei hi sawrkar laipui leina (Minimum support price) aia sanga ni a sawi a ni.

He hmalakna kalpui mek tawh dan meeting hian an sawiho a, Om Om Rice Mill nena thawhho dan te pawh an sawi a ni.

<><><>

MNF

MNF Office Bearer Meeting nimina Aizawla an party office Mizo Hnam Run a neih chuan, sorkarin Zu khap burna Dan (The Mizoram Liquor (Prohibition) Act, 2019) siam danglam a, Wine leh Beer thlah zalen a tum chu pawl an ti tih an sawi a.

He hmalakna hi Zu thlah zalenna hmahruai a ni tih sawiin, Sorkarin Excise & Narcotics Dept kaltlanga ualau taka mi thenkhat te lei theih tura Zu dawr a siam tur chu tha an ti lo tih an sawi a ni.

Meeting hi MNF President Pu Zoramthangan a kaihruai a, meeting chu resolution siamin, thu hrang hrang an rel a, an thu pawm zingah Kohhran leh Tlawmngaipawl te duh loh, khawtlang leh chhungkua tam tak ti chhe tu anih avanga, Zu khap burna Dan (The Mizoram Liquor (Prohibition) Act, 2019) hman mek, siam danglam tumna chu tha an ti lo tih an sawi a ni.

Loneitute hnena ZPM intiamna chu tihlawhtling ngei ngei turin MNF chuan a phut tih an sawi a. Phatmarna leh chhuanlam dawrawm te te siam kual siam kual lova, kuthnathawktute thar chhuah Sawhthing, Hmarcha, Hmunphiah leh Aieng te hi a bo a bang awm lovin lei vek rawh se, an ti a, Mizoram tana rohlu Lengpui Airport IAF kuta hlan chu MNF chuan engti zawng mahin rem a ti dawn lova. Sorkar hian NGO zawng zawng leh Party hrang hrangte duh dan kalha hlan luh a tum a nih chuan a tawp thlengin a do dawn a ni, an ti.

<><><>

MPCC

Mizoram Pradesh Congress Committee MPCC Treasurer Dr. Lalmalsawma Nghakan hmunphiah chingtute manganna chu beidawnna runpuiah a chang chho mek a ti.

MPCC Treasurer hian nimin khan Saiphai, Saipum, Phainuam leh Vairengte khua-a hmunphiah chingtute harsatna a hmunah a tlawh a, sawrkar a intiam anga a din loh avangin Zoram dung leh vanga Kuthnathawkte zingah beidawnna a thleng mek, a ni a ti a, sawrkarin hmunphiah lei tura a intiamna chu a taka chantir a nih loh avangin, hmunphiah eizawng te chawbel ben buak sakin a awm a. Kum tluana an tha sen pawh engmah lovah a chang chho mek a, an hma lam hun beidawng takin an thlir mek a ni a ti.

ZPM Party President Chairman-na ZOHANDCO chu hmunphiah ro quintal 7240 vel Society kaltlanga lei turin sorkarin a ti ni a a hriat thu sawiin, ZPM intiamna kg.-a Rs. 100 tih chu ZOHANDCO hian a aia hniam daih, Rs. 80 in lei a tum a, ZOHANDCO hian a leina tur sum hi an la nei rih chuang lo niin an hre bawh a ti a, Sawrkar lai mek chu pawisa puk chawp leh a ba thlau-a ram a hruai mek ang hian, hmunphiah leh sawhthing leina tur te pawh a ba-in a kalpui dawn niin a lang chho mek a ni a ti.

MNF Sawrkar nen ZPM chu thu tiama din loh kawngah danglamna an nei lova, mipuite beiseina a thlawn a, beidawnna khura hruai lut tu tur an ni tih mipuiin an hmu fiah telh telh a ni, a ti a. ZPM Sawrkar hian kuthnathawh, miharsa leh rahbi nghet lo te harsatna a hmunah en ngai lovin, an dinhmun dik tak a hmu thiam pha lo va, mi nawlpui harsatna hi an hrethiam pha lo tih a Chiang hle a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PM

Prime Minister Narendra Modia chuan nimin khan Japan atanga lo zin sumdawng liante New Delhi-ah a kawm. PM Modia chuan an inkawmna chungchang hi social media-ah tarlangin India-a an sumdawnna huang zauh tura ruahmanna an neih chuan a ti phur hle tih sawiin ramchhunga thilsiam chhuah uar tur leh khawvel tana a tam thei ang ber siam tura ruahmanna an siam chu lawmawm atih thu a sawi a. Japan nen eibar zawnna kawngah thawhdunna zau zawk an neih zel theih a beisei thu a sawi bawk a ni.

<><><>

ROPEWAY

Union Cabinet chuan Soprayag atanga Kedarnath kalpawhna tur ropeway siam a remti. He ropeway hi Km 12.9 a thui tur niin cheng vaibelchhe sang li chuang sen a ni dawn a. Union I&B Minister Ashwini Vaishnaw chuan he ropeway hian sakhaw biakzina kalte tan veivah chhung chu darkar 8-9 atangin minute 36 ah a ti hniam dawn a ti a. Rualbanlote leh kum upaten an chhawr hle dawn tih a sawi bawk a ni.

<><><>

PRESIDENT TRUMP

US President Donald Trump-a chuan kum 2021 August thlaa Kabul airport-a firfiakte chetnaa mawhphurtu man a ni a tawh a ti. Nimina Congress inkhawmah he thu hi sawiin Presdient Trump-a chuan he pawikhawihnaa firfiak hotu ber hi US ah hruai anih thu sawiin a chungah rorelna lekkawh a ni a ti a. An hlawhtlinna chuan America-in Islam firfiakte lakah chak zawka hmalak an tum zia a tilang tih a sawi a ni.

<><><>